



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

---

### არგვეთი

არგვეთი, ისტორიული პროვინცია დას. საქართველოში. მემკვიდრე ლეონტი მროველის (XI ს.) მიხედვით, ა. მოიცავდა ტერიტორიას ლიხის ქედიდან რიონამდე და რაჭის მთებიდან ფერსათის მთებამდე, ე. ი. ახლანდ. ხარაგაულის, საჩხერის, გესტაფონის, თერჯოლისა და ბაღდათის მუნიციპ-ებს, ტყიბულისა და ჭიათურის ზონებს.

ა. საერისთავო ქვეყანა იყო. ქართ. ისტ. წყაროების მიხედვით აქ ჯერ კიდევ ქართლის პირველ მეფეს ფარნავაზს დაუსვამს ერისთავი, მასვე აუგია შორაპნისა და დიმნის ციხეები. ვახტანგ გორგასლის დროს ა. და თავკვერი ერთ საერისთავოს შეადგენდნენ. VIII ს. 30-იან წლებში ა-ის მთავრები იყვნენ დავითი და კონსტანტინე. IX ს-ში ა-ის საერისთავოდ დადგენილი აფხაზთა უფლისწულის დემეტრეს რეზიდენცია ჩიხაში ყოფილა. XI ს. I ნახევარში ა-ის ერისთავებად იხსენიებიან ხურსი და გიორგი. ა-ში იყო შუა საუკ. ერთ-ერთი მძლავრი ფეოდალ. გვარის - ბაღვაშების (ბაღუაშების) მამული. უკანასკნელი ბაღვაშის, რატის სიკვდილის (1103) შემდეგ დავით აღმაშენებელმა მათი მამული ა-ში გელათის მონასტერს შესწირა. XII-XIII სს-ში ა-ის ერისთავებად ამანელისძენი ჩანან. გვიანდ. ფეოდალ. ხანაში ა-ის ტერიტორიაზე ჩამოყალიბდა სათავადოები: სანერეთლო, სააბაშიძეო, საჩხეიძეო და სამხეიძეო.

ა-ში ძირითადად მევენახეობა და მესაქონლეობა იყო განვითარებული. მოიპოვებოდა და მუშავდებოდა სპილენძი, რკინა, ვერცხლი. ა-ის უმნიშვნელოვანესი ციხეები იყო შორაპანი, სკანდა, სვერი, ჩიხა, მუხური და სხვ. საეკლ. ნაგებობათაგან აღსანიშნავია უბისის და ჯრუჭის მონასტრები (ეს უკანასკნელი ხურსი ერისთავმა საგვარეულო სამარხად ააგო X-XI სს. მიჯნაზე), ტაბაკინი და კაცხის ტაძარი (აგებულია 1010 - 14 ბაღვაშების საგვარეულო სამარხად).

წყარო: ვახუშტი, აღწერა სამეფოსა საქართველოსა, წგ.: ქართლის ცხოვრება, ს. ყაუხჩიშვილის გამოც., ტ. 4, თბ., 1973.

ლიტ.: ბ ე რ ძ ე ნ ი შ ვ ი ლ ი ნ., საქართველოს ისტორიის საკითხები, წგ. 1, თბ., 1964; ჯ ა ვ ა ხ ი შ ვ ი ლ ი ივ., ქართველი ერის ისტორია, წგ. 2, თბ., 1983 (თხზ. თორმეტ ტომად, ტ. 2; ჯ ა ნ ა შ ი ა ს., შრომები, [ტ.] 2, თბ., 1952.

**გ. ცქიტიშვილი**

---